

## En regurdientscha da Maria Hendry-Monn

morta ils 9-12-2007

*Vesend Dieus Tia via stentusa,  
il cuolm memia teiss ed il flad engreviont,  
ha El tunschiu a Ti il maun schend:  
«Neu a casa».*



Nossa mumma Maria ei naschida ils 17 d'avrel 1922 sco sisavel affon da Vigeli e Maria Barla Monn-Berther. Suenter ella neschan aunc dus fargliuns. Nossa mumma haveva gnanc treis onns cura che sia mumma miera d'ina pigliola il schaner 1925. Quei ei stau ina greva frida pil bab e ses 8 affons.

La Rosa, la feglia gronda, haveva lu mo 13 onns ed ha surpriu igl entir tener-casa. Ella ei schizun veginida dispensada dalla scola per saver ademplir il pensum da casarina. Tut ils fargliuns ein segidai tenor meglier saver e puder cul menaschi puril ed il bab Vigeli ha teniu bein quen.



Baseli, Barla, Tumaisch, Giusep, bab Vigeli, Rosa, Carmelia, Benedetg, Maria

Havend frequentau la scola obligatoria a Sedrun ei nossa mumma segidada a casa e stada en differentas plazzas ella val. Savens raquintava ella dalla plaza vi Mulin tiels Solivas.

Forsa ha gest quei engaschi urdiu ils contacts cun siu partenari dalla veta. Igl onn 1943 eis ella sespusada cun Benedetg Hendry e giu quater affons: Willy, Sep Aluis, Benedetg e Taddea.

Quei ein datas e fatgs. Mo tgei ha dau cuntegn e muntada alla veta da nossa mumma? Ella ha viviu ed adempliu sia clamada da mumma, da dunna e casarina cun carezia, perschuasiun e mu-destadad. E quei ei in tschuat.

Ella ei stada ina buna sora per ses farigliuns ed ha giu bien quitau da siu bab Vigeli che ha passentau la sera dalla veta tier nus a casa. Ella ha carezau siu um ed accumpignau e tgirau nies bab duront sia greva malsogna. Nies bab (1917-1969) ha retschiert a casa in tractament grondius tochen che la mort ha terminau siu pitir il davos november 1969.

Crescher si senza mumma e piarder il partenari schon cun 47 onns ha caschunau ad ella gronda dolur. Gl'ei ver, nossa mumma ei stada fetg permalada da quellas sperditas ed ei sedumandada stediamein pertgei e daco? Ella ha fatg vess d'acceptar quels buordis, mo la cardientscha en Diu ha dau tegn e regalau confiert.

Treis caracteristicas han accumpignau nossa mumma:

- siu bien cor e sia generusadad
- sia attaschadad alla famiglia
- sia oraziun

Tier nus a casa eran visetas adina beinvegnidas e la mumma surveva bugen in caffè cun ina biена. Ella deva bugen ina paterlada ed appreziava il contact cun parents e vischins. Sia attaschadad visavi nus affons e biadis ha ella viviu di per di, onns alla liunga cun adina esser d'entuorn e promta da segidar tenor sias forzas. Specials radis da sulegl ein ils quater sutbiadis stai per ella.

Ses cudischs d'oraziun eran isai e dattan perdetga dil diever cuntuau. Ella fageva oraziun la damaun, da miezdi, denteren recitava ella rusari e la sera





**Bab e mumma en costum  
tuatschin a caschun d'ina fiasta**

suandava in ritual pli liung. En baselgia mava ella bugen ed en Casa s. Vigeli ha ella gudiu d'astgar assister min-tga di alla s. messa.

Quellas valurs quentan e cuozan.

Jeu hai il basegns d'engraziar cordial-mein a nossa sora Taddea ch'ei ida a pèr cun nossa mumma onns alla liunga. Il Willy ha fatg ton bien ed il ligiom denter la mumma ed el ei staus tut specials. In engraziel fetg a tuts quels che han purschiu il maun, han visitau e fatg dil bien, han tgirau ed accumpagnau nossa mumma.

Cara mumma, nus engrazien per la cuminanza che ha uniu nus cun Tei sco era per la carezia e tut bien che Ti has regalau a nus. Ruaussa ella glisch divina.

Beni



**Ils geniturs cun Sep Aluis e Willy**